



**Judicial System Monitoring Programme
Programa Monitorizasaun Sistema Judicial**

Sumáriu Kazu: 2013

Tribunál Distritál Suai

Edisaun: Jullu 2013

**Sumáriu julgamentu kazu Tribunál Distritál Suai
Semana dahuluk no daruak Jullu 2013**

Introdusaun

Iha semana dahuluk no daruak fulan Jullu 2013, JSMP monitoriza kazu hamutuk 20 ne'ebé julga iha Tribunál Distritál Suai (TDS).

Kazu hirak ne'e kompostu husi kazu krime aktu seksuál ba adolusente 1, kazu furtu agravadu 2, kazu violénsia doméstika 4, kazu furtu simples 1, kazu ofensas ba integridade fizika simples 5, kazu violasaun seksuál 3, kazu koasaun seksuál 1, kazu pekulatu 1, kazu ameasa 1 no kazu maustratus 1.

Tuir mai deskripsaun sumáriu julgamentu kazu kompletu:

1. Kazu krime aktu seksuál ho adolusente -Nú. Prosesu 135/pen/2013/TDS

| | |
|----------------------|---|
| Kompozisaun Tribunál | :Singulár |
| Juis | : Dr. Costâncio Barros Basmery |
| Ministériu Públiku | : Dra. Benvinda da Costa Rosario |
| Defeza | : Dr. João Henrique de Carvalho |
| Konkluzaan | : Pena prizaun tinan 3 no suspende ba tinan 5 |

Iha 04 Jullu 2013, Tribunál Distritál Suai hala'o julgamentu ba kazu aktu seksuál ho adolusente ne'ebé involve arguidu Luis Ximenes hasoru vítima MB. Kazu ne'e akontese iha 04 Abril 2012, iha Aldea Laconak, Distritu Covalima.

Ministériu Públiku akuza katak, iha 04 Maiu 2012, maizumenus iha tuku 08:00 kalan, arguidu ba vítima nia uma hodi halo relasaun seksuál ho vítima dala rua.

Iha tribunal, arguidu deklara katak sira halo relasaun seksuál ne'e tanba hakarak ho hakarak. Arguidu mós deklara katak durante ne'e sira iha relasaun namora, maibé to'o ikus arguidu rona fali katak vítima namora fali ho mane seluk. Tanba ne'e arguidu hadok aan husi vítima. Arguidu mós deklara katak arguidu selu tiha indemnizasaun hamutuk \$ 300.00 ba vítima.

Ministériu Públiku akuza arguidu kontra artigu 178 Kódigu Penál kona-ba aktu seksuál adolente ne'ebé bele kondena ho pena prizaun to'o tinan 5.

Iha alegasaun, finál Ministériu Públiku intrega tomak ba tribunál mak deside no defeza husu ba tribunál atu atribui suspensaun ba pena prizaun ba arguidu.

Bazeia ba faktus hirak ne'ebé produz iha julgamentu, tribunal konklui kazu ne'e hodi kondena arguidu ho pena prizaun tinan 3 no suspende ba tinan 5.

2. Kazu krime ofensas ba integridade física simples-Nú. Prosesu: 132/Pen/2013/TDS.

| | |
|----------------------|---------------------------------|
| Kompozisaun Tribunál | : Singulár |
| Juis | : Dr. Costâncio B. Basmerly |
| Ministériu Públiku | : Dr. Felismino Garcia Cardoso |
| Defeza | : Dr. João Henrique de Carvalho |
| Konkluzau | : Absolvidu |

Iha 05 Jullu 2013, Tribunál Distritál Suai hala'o julgamentu ba kazu ofensas ba integridade simples ne'ebé involve arguidu Florindo Moniz hasoru vítima Aniceta De Jesus. Kazu ne'e akontese iha 08 Marsu 2013, iha Suco Beco, Distritu Covalima.

Ministériu Públiku akuza katak, iha 08 Marsu 2013, maizumenus iha tuku 10:00 dader-san, arguidu lori ai-dona ida baku vítima nia liman loos no susun sorin karuk ne'ebé rezulta bubu metan iha susun.

Relasiona ho kazu ne'e, Ministériu Públiku akuza arguidu kontra artigu 145 Kódigu Penál kona-ba ofensas ba integridade física simples.

Arguidu deklarara iha tribunál katak depoisde akontese problema ne'e sira diak malu fali no nunka iha problema seluk. Arguidu mós deklarara katak nia arepende hahalok ne'ebé mak nia halo.

Iha alegasaun finál, Ministériu Públiku husu ba tribunál atu kondena arguidu selu idemnizasaun US\$ 50 ba vítima, tanba provadu kometa krime ofensa ba integridade física simples hasoru vítima. Defeza mos konkorda ho alegasaun husi Ministériu Públiku nian.

Bazeia ba prosesu hirak ne'e no sirkunstansia atenuante sira ne'ebé partensia ba kazu ne'e, tribunal konklui no absolve arguidu husi akuzasaun ne'e.

3. Kazu krime ameasa-Nú. Prosesu: 78/pen/2013/TDS

| | |
|----------------------|----------------------------------|
| Kompozisaun Tribunál | : Singulár |
| Juis | : Dr. Pedro Raposo de Figueiredo |
| Ministériu Públiku | : Dr. Felismino Garcia Cardoso |
| Defeza | : Dr. Marçal Mascharenhas |
| Konkluzau | : Absolvidu |

Iha 15 Jullu 2013, Tribunál Distritál Suai hala'o julgamentu leitura sentensa ba kazu ameasa ne'ebé involve arguidu Jesuino do Carmo hasoru vítima Alianca da Costa. Kazu ne'e akontese iha 24 Janeiru 2013, iha Distritu Covalima.

Ministériu Públiku akuza katak, iha 24 Janeiru 2013, maizumenus iha tuku 03:00 lorokraik, arguidu ba iha nia to'os hare ema taa hela nia ai-kameli iha nia to'os laran.

Arguidu deklara katak nia laiha planu atu estraga no fa'an ai kameli ne'e. Maibé, tanba nia hare ema na'ok no taa hela nia ai-kameli iha momentu ne'ebá, nune'e, arguidu rasik taa ai-kameli ne'e lori ba rai iha nia uma.

Iha momentu ne'ebá vítima hare no keixa ba polisia katak arguidu mak na'ok ai-kameli ne'e. Tanba ne'e arguidu hirus hodi ameasa no trata vítima.

Relasiona ho aktu ne'e, Ministériu Públiku akuza arguidu kontra artigo 157 kona-ba ameasa ho pena prizaun to'o tinan 2 ka multa.

Iha alegasaun finál Ministériu Públiku husu ba tribunál atu kondena arguidu ho pena multa. Iha parte seluk, defeza husu ba tribunál atu absolve arguidu tanba faktu sira ne'ebé apresenta ba tribunal la provadu.

Hafoin rona tiha alegasaun husi parte sira, Tribunál konklui kazu ne' hodi absolve ba arguidu husi prosesu ne'e.

4. Kazu krime ofensas ba integridade física simples-Nú. Prosesu: 137/pen/2013/TDS

| | |
|----------------------|---------------------------------|
| Kompozisaun Tribunál | : Singulár |
| Juis | : Dr. Costâncio B. Basmery |
| Ministériu Públiku | : Dr. Felismino Garcia Cardoso |
| Defeza | : Dr. João Henrique de Carvalho |
| Konkluzau | : Absolvidu |

Iha 08 Julu 2013, Tribunál Distritál Suai hala'o julgamentu ba kazu ofensas ba integridade fizika simples ne'ebé involve arguidu Natalino Mendonca hasoru vítima Gaudêncio Felix Gusmão. Kazu ne'e akontese iha 05 Maiu 2013, iha Distritu Covalima.

Ministériu Públiku akuza katak, iha 05 Maiu 2013, maizumenus iha tuku 11:45 dader, arguidu lori botir rahun sona vítima nia ulun no rezulta vítima hetan kanek no ran sai.

Ministériu Públiku akuza arguidu kontra artigo 145 Kodegu Penál kona-ba ofensas ba integridade fizika simples.

Iha tribunal, arguidu deklara katak depoisde akontese problema ne'e sira diak malu fali no nunka halo tan problema seluk. Arguidu mós mainifesta arependementu ba nia hahalok ne'ebé mak nia halo ona hasoru vítima.

Iha alegasaun finál, Ministériu Públiku husu ba tribunál atu kondena arguidu selu idemnizasaun sivil ba vítima hamutuk US\$ 75.00 tanba arguidu provadu kometa duni krime ne'e. Defeza mos konkorda ho alegasaun husi Ministériu Públiku nian.

Mesmu nune'e, tribunál konklui kazu ne'e no absolve ba arguidu husi kazu ne'e.

5. Kazu krime violénsia doméstika-Nú. Prosesu:121 /pen /2013/TDS

Kompozisaun Tribunál : Singulár
Juis : Dr. Costâncio Barros Basmerly
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Sei kontinua prosesu

Iha 17 Jullu 2013, Tribunál Distritál Suai hala'o julgamentu ba kazu violénsia doméstika ne'ebé involve arguidu LdS kontra nia feen ASS. Kazu ne'e akontese iha 21 Outubru 2011, iha Suco Holpilat, Distritu Covalima.

Ministériu Públiku akuza katak, iha 21 Outubru 2011, maizumenu iha tuku 11:00 dader, arguidu tuku vítima nia isin, kotuk laran no iha hasan. Aleinde ne'e, arguidu mós kontinua riba ba rai no rezulta vítima nia ain túr no liman kanek.

Vítima deklara iha tribunál katak, kazu ne'e akontese tanba arguidu hola tan fetu seluk no vítima la konkorda, nune'e arguidu nervoju hodi halo agresaun hasoru vítima.

Ministériu Públiku akuza arguidu kontra artigu 145 Kódigu Penál, konabá ofensa ba integridade fizika simples ho natureza krime violénsia doméstika konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Públiku husu tribunál atu kondena arguidu ho pena multa hamutuk US\$ 150.00 ne'ebé sei selu gradualmente US\$ 0.50 kada loran durante loran 300 nia laran. Defeza husu ba tribunál atu hatun pena multa husi loran 300 no ba loran 30 nian laran.

Depois rona tiha alegasaun husi parte sira, tribunal marka fali julgamentu leitura sentesa iha 31 Jullu 2013, iha tuku 10:00 dader.

6. Kazu krime furtu agravadu Nú. Prosesu 133 /pen/2013/TDS

Kompozisaun Tribunál : Koletivu
Juis : Dr. Pedro Raposo de Figueiredo, Dr. Costâncio B. Basmerly
no Dr. Hugo da Cruz Pui.
Ministériu Públiku : Dra. Benvinda da Costa Rosario
Defeza : Dr. Marçal Mascrenhas
Konkluzau : Kondena ho pena prizasaun tinan 3 maibe suspende ba tinan 5 no selu indemnizasaun sivil ba vítima

Iha 11 Jullu 2013, Tribunál Distritál Suai, hala'o julgamentu ba kazu furtu agravadu ne'ebé mak involve arguidu JI ho VB hasoru MDR. Kazu ne'e akontese iha 26 Abril 2013, iha Distritu Covalima.

Ministériu Públiku akuza katak, iha 26 Abril 2013, maizumenu iha tuku 11:00 dader arguidu nain rua atu ba na'ok karau. Maibé to'o iha dalan klaran arguidu VB fila fali tanba nia tauk, no arguidu JI mak kontinua ba duni karau mai nia kintal laran, kaer no fa'an tiha karau sira ne'e.

Ministériu Públiku akuza arguidu sira kontra artigu 252 Kódigu Penál kona-ba furtu agravadu ne'ebé nia moldura penál tinan 2 to'o 8 iha prizaun.

Arguidu deklara katak, loos duni nia mak no'ak karau ne'e iha dader depoisde ikus mai nia fa'an tiha karau sira ne'e.

Iha alegasaun finál, Ministériu Públiku husu ba tribunál atu kondena arguidu JI ho pena prizaun tinan 4 suspende ba tinan 5, no selu pena indemnizasaun ba vítima.

Tribunál konklui kazu ne'e hodi kondena arguidu JI ho pena prizaun tinan 3 no suspende ba tinan 5. Tribunal mós kondena arguidu selu indemnizasaun US\$ 1.600.00 ba vítima durante fulan 6 nia laran no absolve arguidu VB husi prosesu ne'e.

7. Kazu krime violasaun-Nú. Prosesu 12 /pen/2013/TDS

| | |
|----------------------|--|
| Kompozisaun Tribunál | : Kolektivu |
| Juis | : Dr. Costâncio B. Basmery, Dr. Pedro Raposo de Figueiredo |
| no Dr. Hugo da Cruz | |
| | Pui |
| Ministériu Públiku | : Dr. Jacinto Babo Soares |
| Defeza | : Dr. Marcal Mascrenhas |
| Konkluzau | : Kondena tinan 6 no selu indemnizasaun sivil ba vítima |

Iha 12 Jullu 2013, Tribunál Distritál Suai hala'o julgamentu leitura sentesa ba kazu violasaun seksuál. Kazu ne'e involve arguidu AT hasoru vítima VDS, ne'eb'e akontese iha 26 Setembru 2012, iha Batugade, Distritu Bobonaro.

Ministériu Públiku akuza katak iha 26 Setembru 2012, maizumenus iha tuku 12:00 kalan arguidu ba vítima nia uma hodi taka "*stop kontak*" eletrisidade nian, arguidu hare vítima toba hela.

Tanba ahi mate vititma tauk no hader husi kuartu laran maibé arguidu besik ba hodi liman taa dala rua iha vítima nia kakorok no vítima monu ba rai no hader ladaik. Iha momentu ne'e, mak arguidu aproveita hodi halo violasaun seksuál hasoru vítima.

Vítima deklara ba tribunál katak nia traumatizada no moe no sente la bele lao ho livre iha fatin ne'ebé nia hela ba . Tanba ne'e, vítima halai ba hela iha "Uma Mahon Fokupers iha Maliana, durante loran rua.

Ministériu Públiku akuza arguidu kontra artigu 172 kona-ba violasaun ne'ebé nia pena abstratu entre tinan5 to'o 15 prizaun. Defeza husu ba tribunál atu fó pena ne'be kman ba arguidu tanba arguidu konfesa loloos kona-ba faktus ne'ebé nia halo.

Bazeia ba faktu sira ne'e, iha tribunál konklui kazu ne'e hodi kondena arguidu ho pena prizaun durante tinan 6 no selu indemnizasaun US\$ 600.00, ba vítima.

8. Kazu krime maustratus Nú. Prosesu 95/pen/2012/TDS

| | |
|---------------------------------|---|
| Kompozisaun Tribunál | : Kolektivu |
| Juis | : Dr. Pedro Raposo de Figueiredo, Dr. Hugo da Cruz Pui, |
| no Dr. Costâncio Barros Basmery | |
| Ministériu Públiku | : Dra.Benvinda da Costa Rosario |
| Defeza | : Dr. João Henrique de Carvalho |

Konkluzau : Kondena pena prizaun loron 80 no selu multa ba US\$ 96.

Iha 12 Jullu 2013, Tribunál Distritál Suai prezide leitura sentesa ba kazu maustratus ne'ebé involve arguidu HB hasoru nia feen. Kazu ne'e akontese iha 06 Janeiru 2012, iha Distritu Bobonaro.

Ministériu Públiku akuza katak, iha 06 Janeiru 2012 maizumenus iha tuku 09:00 dader, arguidu ho vítima diskuti malu kona-ba osan tula *ret* (rai henek) nian.

Vítima dun (akuza) katak arguidu mak tula rai hekenek ne'e hodi ba hatuun iha dalan ninin, maibe arguidu rekuza katak laos nia mak tula. Maske nune'e, vítima kontinua la fiar no arguidu nervozu no tuda vítima nia oin ho kalen *biscuit* no rezulta vítima hetan kanek no ran sai.

Relasiona ho aktu ne'e, Ministériu Públiku akuza ho artigu 154 Kódigu Penál kona-ba maustratus ne'ebé ninia moldura penál tinan 2 to'o tinan 6 iha prizaun.

Arguidu deklarata katak nia lori duni kalen *biscuit* tuda ba vítima maibé agora sira diak malu ona no la iha tan problema seluk. Arguidu mós promote katak nia sei la komete tan krime hanesan iha futuru.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 2 suspende ba tinan 4.

Defeza husu ba tribunál fó pena ne'ebé justu ba arguidu tanba arguidu konfesa loloos tuir faktus ne'ebé akuza ba nia.

Tribunál konklui kazu ne'e no kondena arguidu ho indemnizasaun US\$ 96.00 ba vítima maibé kuandu arguidu la kumpri arguidu sei tama prizaun efetivamente iha loron 80 nia laran.

9. Kazu krime violasaun seksuál-Nú. Prosesu 96 /pen/2013/TDS.

| | |
|----------------------------------|---|
| Kompozisaun Tribunál | : Koletivu |
| Juis no Dr. Hugo da Cruz Pui. | : Dr. Costâncio B. Basmery, Dr. Pedro Raposode Figueiredo |
| Ministériu Públiku | : Dr. Jacinto Babo Soares |
| Defeza | : Dr. Marçal Mascrenhas |
| Konkluzau | : Kondena tinan 6 no selu indemnizasaun US\$ 1000.00 |

Tuir mai, iha 12 Jullu 2013, Tribunál Distritál Suai mós prezide leitura sentesa ba kazu violasaun seksuál ne'ebé involve arguidu EJBS ho DN hasoru vítima CM. Kazu ne'e akontese iha 03 Novembru 2012, iha Distritu Bobonaro.

Ministériu Públiku akuza katak iha 03 Novembru 2012 maizumenus iha 03:00 lorokraik, arguidu EJBS tula vítima ho hodi ba lao halimar ba iha area Utedai nian.

Wainhira to'o iha dalan klaran arguidu dehan ba vítima katak sira para lai no haruka vítima tun husi motor leten. Depois tun husi motor leten, vítima husu ba arguidu katak sira atu halo saida, no arguidu hatan katak nia hakarak halo relasaun seksuál ho vítima.

Vítima deklarata ba tribunál katak wainhira sira halo hela relasaun seksual derepentini arguidu DN mósu mai hodi foti tia sira nia roupa no ameasa atu lori vítima ho arguidu ba sira nia inan ho aman.

Momentu ne'e arguidu DN mós grava hela atividade relasaun seksual entre EJBS ho vítima no amiasa atu ba hatama iha internet no keixa ba polisia intelejen sira.

Arguidu DN aproveita situasaun ne'e no amiasa vítima hodi halo relasaun seksuál ho vítima, nune'e nia bele apaga tiha materia gravasaun relasaun seksual entre vítima ho arguidu nian. Infelizmente depois halo tiha relasaun seksual ho vítima arguidu (DN) la apaga materia gravasaun ne'e, maibe pior liu arguidu espalla filme (gravasaun) ne'e ba comunidade iha Maliana laran tomak.

Relasiona ho aktu ne'e, Ministériu Públiku akuza arguidu kontra artigu 178 Kódigu Penál (KP) ho adulsente no 172 KP kona-ba violasaun konjuga ho artigu 183 KP kona-ba devisa.

Iha alegasaun finál, Ministériu Públiku husu ba tribunál kondena arguidu EJBS ho pena prizaun maibe suspende no kondena arguidu DN ho pena prizaun tinan 9 no selu indemnizasaun ba vítima. Iha parte seluk, defeza husu ba tribunál fó pena ne'ebé kma'an ba arguidu DN.

Tribunál konklui kazu ne'e hodi absolve ba arguidu EJBS no kondena arguidu DN ho pena prizaun tinan 6 no selu indemnizasaun ba vítima ho montante US\$ 1000.00.

10. Kazu krime furtu simples-Nú. Prosesu 121 /pen /2013/TDS

| | |
|----------------------|--------------------------------------|
| Kompozisaun Tribunál | : Singulár |
| Juis | : Dra. Florencia Freitas |
| Ministériu Públiku | : Dr. Felismino Garcia Cardoso |
| Defeza | : Dr. João Henrique de Carvalho |
| Konkluzau | : Pena multa ho montante US\$ 400.00 |

Iha 22 Jullu 2013, Tribunál Distritál Suai hala'o julgamentu ba kazu furtu simples ne'ebé involve arguidu JB, VAD, GT ho AS kontra vítima BA. Kazu ne'e akontese iha 10 Agostu 2011, iha Distritu Ainaro.

Ministériu Públiku akuza katak, iha 10 Agostu 2011, maizumenus iha tuku 10:00 dader, arguidu sira oho/taa tia vítima nia karau ne'ebé tama ba arguidu sira nia to'os no han tiha batar iha arguidu sira nia kintal laran.

Vítima deklara ba tribunál katak arguidu sira oho no han tiha nia karau aman ida no sira la koho selu ba vítima.

Relasiona ho aktu ne'e, Ministériu Públiku akuza arguidu sira kontra artigu 251 kona-ba furtu simples ho moldura penal tinan 3 ka multa.

Iha alegasaun final, Ministériu Públiku husu ba tribunál atu aplika pena multa ba arguidu sira. Defeza mós konkorda ho alegasaun husi Ministériu Públiku nian.

Tribunál konklui kazu ne'e no kondena arguidu sira selu fali osan US\$ 400.00 ba vítima.

11. Kazu krime violénsia doméstika- Nú. Prosesu 143/pen /2013/TDS

| | |
|----------------------|------------|
| Kompozisaun Tribunál | : Singulár |
|----------------------|------------|

Juis : Dr. Pedro Raposo de Feiguireido
Ministériu Públiku : Dr. Felismino Garcia Cardoso
Defeza : Dr. João Henrique de Carvalho
Konkluzau : Kondena ho pena prizaun fulan 6 suspende ba tinan 1 no selu
kustas judisiais US\$ 10.00

Iha 22 Jullu 2013, Tribunál Distritál Suai hala'o julgamentu ba kazu violénsia doméstika ne'ebé involve arguidu NLSP hasoru nia feen LG. Kazu ne'e akontese iha 10 Marsu 2012, iha Distritu Ainaro.

Ministériu Públiku akuza katak, iha 10 Marsu 2012, maizumenus tuku 10:00 dader, arguidu deskuti malu ho vítima kona-ba susu ben labarik nian.

Vítima deklara ba tribunál katak, kazu ne'e akontese tanba arguidu la sosa susu ben ba labarik no vítima husu arguidu atu sosa, nune'e arguidu nervoju no tuku iha vítima nia kotuk laran no ibun. Aktu ne'e rezulat vítima hetan kanek no ran sai husi inus no bubu iha kotuk laran.

Ministériu Públiku akuza arguidu kontra artigu 145 Kódigu Penál, konabá ofensa ba integridade fizika simples konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Públiku husu tribunál atu kondena arguidu ho pena prizaun maibe suspende nia ezekusaun no defeza konkorda ho alegasaun ne'e.

Tribunál konklui kazu ne'e hodi kondena arguidu ho pena prizaun fulan 6 suspende ba tinan 1 no selu kustas judisiais US\$ 10.00.

12. Kazu krime ofensas ba integridade fizika simples –Nú Prosesu 29 /pen/2013/TDS

Kompozisaun Tribunál : Singulár
Juis : Dra. Florencia Freitas
Ministériu Públiku : Dr. Felismino Garcia Cardoso
Defeza : Dr. João Henrique de Carvalho
Konkluzau : Absolvidu

Iha 22 Jullu 2013, Tribunál Distritál Suai hala'o julgamentu ba kazu ofensas simples ne'ebé involve arguidu Abel de Araujo hasoru vítima Fernando Mendonca. Kazu ne'e akontese iha 30 Novembru 2011, iha Distritu Ainaro.

Ministériu Públiku akuza katak, iha 30 Novembru 2011, maizumenus iha tuku 03:00 madrugada, arguidu lori fatuk ida tuda iha vítima nia ibun sorin karuk no rezulta vítima monu ba rai.

Ministériu Públiku akuza arguidu kontra artigu 145 Kodegu Penál kona-ba ofensas ba integridade fizika simples.

Arguidu deklara katak depoisde akontese problema ne'e sira diak malu fali no nunca halo tan problema no arguidu deklara katak nia arepende saida mak nia halo ona ba vítima.

Iha alegasaun finál, Ministériu Públiku husu ba tribunál atu absolve arguidu husi prosesu ne'e. Aleinde ne'e, defeza konkorda ho alegasaun husi Ministériu Públiku nian.

Bazeia ba pedidu husi parte sira, tribunál konklui kazu ne'e no absolve arguidu husi prosesu ne'e.

13. Kazu krime violasaun seksuál-Nú. Prosesu: 114/pen/2013/TDS.

| | |
|---------------------------|---|
| Kompozisaun Tribunál | : Koletivu |
| Juis | : Dr. Costâncio B.Basmery, Dr.Pedro Raposo de Figueiredo |
| no Dra. Florencia Freitas | |
| Ministériu Públiku | : Dr. Jacinto Babo Soares |
| Defeza | : Dr. Marçal Mascrenhas |
| Konkluziun | : Kondena ho pena prizaun tinan 6 no selu indemnizasaun ba US\$ 1000.00 |

Iha 24Jullu 2013,Tribunál Distritál Suai hala'õ julgamentu ba kazu violasaun seksuál ne'ebé involve arguidu AN hasoru vítima RR. Kazu ne'e akontese iha 02 Jullu 2007, iha Distritu Ainaro.

Ministériu Públiku akuza katak iha 02 Jullu 2007, maizumenus iha 08:00 dader, arguidu husu ba vítima nia inan ho aman atu lori vítima ba tuir kursu ingles iha Osnaco. Maibé to'o iha ne'ebá arguidu lori vítima ba iha nia kuartu laran no hatoba vítima iha kama leten no halo relasaun seksuál ho vítima. Aktu ne'e rezulta vítima hetan ran sai no moras depois sira halo relasaun hotu.

Iha tribunal arguidu deklarata katak nia la halo relasaun seksuál ho vítima arguidu mós deklarata katak vítima lori lia bobar no lia bosok atu hodi kastigu nia.

Relasiona ho aktu ne'e, Ministériu Públiku akuza arguidu kontra artigu 172 Kódigu Penál kona-ba violasaun ne'ebé ho nia moldura penal entre husi tinan 5 to'o 15 prizaun.

Iha alegasaun finál, Ministériu Públiku husu ba tribunál atu kondena arguidu ho pena husi loron 1 to'o tinan 12 prizaun.

Defeza husu ba tribunál atu absolve arguidu husi prosesu ne'e, tanba provas sira ne'e laos mai husi vítima tanba vitima rasik mate tiha ona.

Bazeai ba faktu sia ne'e, tribunal konklui prosesu ne'e no kondena arguidu ho pena prizaun tinan 6 no selu indemnizasaun US\$ 1000.00 ba vítima.

14. Kazu krime ofensas ba integridade física simples-Nú. Prosesu: 145/pen/2013/TDS.

| | |
|----------------------|---------------------------------|
| Kompozisaun Tribunál | : Singulár |
| Juis | : Dr.Costâncio B. Basmery |
| Ministériu Públiku | : Dr. Benvinda da Costa Rosário |
| Defeza | : Dr.João Henrique de Carvalho |
| Konkluziun | : Absolvidu |

Iha 25 Jullu 2013, Tribunál Distritál Suai hala'õ julgamentu ba kazu ofensas simples ne'ebé involve arguidu Domingos Lopes hasoru vítima Francisco Corte Real. Kazu ne'e akontese iha 18 Abril 2013, iha Distritu Ainaro.

Ministériu Públiku akuza katak, iha 18 Abril 2013, maizumenus iha tuku 04:00 lorokraik, arguidu lori lori fatuk ida tuda iha vítima ain kabun no rezulta vítima hetan kanek.

Ministériu Públiku akuza arguidu kontra artigu 145 Kódigu Penál kona-ba ofensas ba integridade fizika simples.

Arguidu deklara katak depoisde akontese problema ne'e sira diak malu fali no nunca halo tan problema seluk. Arguidu mós deklara katak nia arepende nia hahalok ne'e.

Iha alegasaun finál, Ministériu Públiku husu ba tribunál atu absolve arguidu husi prosesu krime ne'e. Defeza konkorda ho alegasaun husi Ministériu Públiku nian.

Bazeia ba faktu sira ne'e, tribunál konklui kazu ne'e no absolve ba arguidu husi prosesu ne'e.

15. Kazu krime violénsia doméstika-Nú. Prosesu 87 /pen /2012/TDS

Kompozisaun Tribunál : Singulár
Juis : Dra. Florencia Freitas
Ministériu Públiku : Dra. Benvinda da Costa Rosario
Defeza : Dr. Marcal Mascarenhas
Konkluzau : Kondena ho pena multa US 30 US no selu kustsas judisiais US 10.00

Iha 25 Jullu 2013, Tribunál Distritál Suai hala'o julgamentu ba kazu violénsia doméstika ne'ebé involve arguidu AS hasoru nia feen. Kazu ne'e akontese iha 08 Maiu 2012, iha Distritu Same – Manufahi.

Ministériu Públiku akuza katak, iha 08 Maiu 2012, maizumenus iha tuku 03:00 lorokraik arguidu tuku vítima nia hasan no tuda rahun vítima nia telefone.

Vítima deklara ba tribunál katak, kazu ne'e akontese tanba arguidu husu modo atu han maibé modo seidak tasak arguidu nervoju hamriik hodi tuku vítima nia hasan too ran suli no ibun laran hetan bubu.

Ministériu Públiku akuza arguidu kontra artigu 145 Kódigu Penál, konabá ofensa ba integridade fizika simples konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Públiku husu ba tribunál atu kondena arguidu ho pena multa. Defeza mos konkorda ho alegasaun husi Ministériu Públiku.

Tribunál konklui kazu ne'e hodi kondena arguidu ho pena multa US\$ 30 no selu kustsas judisiais US\$10.

16. Kazu krime violénsia doméstika-Nú. Prosesu 144 /pen /2013/TDS

Kompozisaun Tribunál : Singulár
Juis : Dr. Costâncio B. Basmery
Ministériu Públiku : Dra. Benvinda da Costa Rosario
Defeza : Dr. Marcal Mascarenhas
Konkluzau : Kondena ho pena prizaun fulan 6 maibe suspende ba tinan 1.

Iha 25 Jullu 2013, Tribunál Distritál Suai, hala'o julgamentu ba kazu violénsia doméstika ne'ebé involve arguidu DGX hasoru nia feen. Kazu ne'e akontese iha 27 Marsu 2013 iha Distritu Ainaro.

Ministériu Públiku akuza katak iha 27 Marsu 2013, maizumenus tuku 09:00 dader, arguidu sama vítima nia ain no tuku-tebe iha vítima nia kotuk laran.

Arguidu deklar ba tribunál katak kazu ne'e akontese tanba vítima trata nia inan -aman, no arguidu nervoju hodi tuku no tebe vítima.

Ministériu Públiku akuza arguidu kontra artigu 145 Kódigu Penál konabá ofensa ba integridade fizika simples ho natureza krime violénsia doméstik konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Publikú husu tribunál atu kondena arguidu ho pena prizaun fulan 3 no suspende ba fulan 6. Defeza mos konkorda ho alegasaun husi Ministériu Públiku nian.

Tribunál konklui kazu ne'e no kondena arguidu ho pena prizaun fulan 6 suspende ba tinan 1.

17. Kazu krime furtu agravadu-Nú. Prosesu; 97 /pen/2013/TDS

Kompozisaun Tribunál : Koletivu
Juis : Dra.Florencia Freitas Dr.Pedro raposo de Figueiredo, Dr.
Costâncio no B. Basmerly
Ministériu Públiku : Dra.Benvinda da Costa Rosario
Defeza : Dr. João Henrique de Carvalho
Konkluziun : Kondena ho pena prizaun tinan 2 fulan 6 suspende ba tian 3.

Iha 25 Jullu 2013,Tribunál Distritál Suai julgakazu furtu agravadu ne'ebé involve arguidu JCT hasoru Estadu. Kazu ne'e akontese iha 27 Maiu 2007, iha Distritu Same-Manufahi.

Ministériu Públiku akuza katak, iha 27 Maiu 2007, maizumenus iha tuku 01:00 madrugada, arguidu lori jerigen ba naok gazoel litru 70 ne'ebe partensia ba iha sentru eletrisidade Betano ninian.

Ministériu Públiku akuza arguidu sira kontra artigu 252 Kódigu Penál kona-ba furtu agravadu ne'ebé ho nia pena abstratu entre tinan 2 to'o tinan 8 prizaun.

Arguidu deklar katak, loos duni nia mak no'ak gazeol ne'e hodi sustenta nia moris maibé arguidu entrega fila fali ona gazoel ne'ebé mak nia na'ok ne'e ba iha Xefe Suco hodi entrega fali ba Xefe Elitrisidade nian iha Betano.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 4 suspende ba tinan 3.

Tribunál konklui kazu ne'e no kondena arguidu ho pena prizaun tinan 2 fulan 6 no suspende ba tinan 3.

18. Kazu krime koasaon seksuál Nú. Prosesu: 59/pen/2013/TDS.

Kompozisaun Tribunál : Koletivu
Juis : Dr.Pedro Raposo de Figueiredo, Dr.Costâncio B. Basmerly
no Dra. Florencia Freitas
Ministériu Públiku : Dr. Felismino G. Cardoso
Defeza : Dr. João Henrique de Carvalho

Konkluziun : Kondena ho pena prizaun tinan 2 fulan 6 suspende ba tinan 3.

Iha 26 Jullu 2013, Tribunál Distritál Suai prezide julgamentu ba kazu koasaun seksuál ne'ebé involve arguidu AP hasoru vítima NC. Kazu ne'e akontese iha 13 Agostu 2012, iha Distritu Ainaro.

Ministériu Públiku akuza katak, iha 13 Agostu 2012 maizumenus iha tuku 03:00 lorokraik arguidu AP ba kuru bee. Iha momentu ne'ebá, arguidu haree vítima haris hela no arguidu hakbesik ba hodi kaer no hakuak vítima.

Vítima deklara ba tribunál katak arguidu kaer no hakuak metin nia depois vítima tata arguidu nia liman hodi husik nia no vítima halai ba subar iha uma laran. Depoisde akontesementu ne'e vítima hato'o ba nia inan-aman no sira ba halo denunsia iha Esquadra Polisia Ainaro.

Ministériu Públiku akuza arguidu kontra artigu 171 Kódigu Penál kona-ba koasaun seksuál ne'ebé nia pena abstratu entre tinan 2 to'o tinan 8 prizaun.

Iha alegasaun finál Ministériu Públiku husu ba tribunál atu kondena arguidu tanba provadu komete krime ne'ebé akuza ba nia. Defeza husu ba tribunál atu suspende husi pena prizaun, tanba arguidu konfesa loloos tuir provas no faktus ne'ebé mak nia halo.

Tribunál konklui kazu ne'e no kondena arguidu ho pena prizaun tinan 2 fulan 2 no suspende ba tinan 4.

19. Kazu krime pekulatu-Nú. Prosesu 159/pen/2013/TDS

Kompozisaun Tribunál : Koletivu
Juis : Dra. Florencia Freitas, Dr. Pedro Raposo de Figueiredono
Dr. Costâncio Barros Basmery
Ministériu Públiku : Dr. Felismino G. Cardoso
Defeza : Dr. João Henrique de Carvalho
Konkluziun : Adia

Iha 19 Juñu 2013, Tribunál Distritál Suai adia julgamentu ba kazu pekulatu ne'ebé involve arguidu nain 10. Arguidu sira ida-idak ho inisial JP, AC, CN, LC, JBC, JC, FC, JAM, JA no AS hasoru vítima LA, iha Distritu Same-Manufahi ne'ebé akontese iha 01 Janeiru 2013.

Prosesu ne'e adia tanba rguida sira la marka prezensa ih Tribunál Distritál Suai, mesmu hetan ona karta notifikasaun. Tanba razaun ne'e, tribunal marka fali orariu julgamentu ba iha 23 Outubru 2013.

20. Kazu krime ofensa ba integridade física simples-Nú. Prosesu 196/ pen / 2012 /TDS.

Kompozisaun Tribunál : Singulár
Juis : Dra. Florencia Freitas
Ministériu Públiku : Dr. Felismino G. Cardoso
Defeza : Dr. João Henrique de Carvalho
Konkluziun : Kondena ho pena prizaun tinan 1 fulan 6 suspende ba tinan 2 no selu kustas judisial US\$10.00.

Iha 26 Jullu 2013, Tribunál Distritál Suai prezide julgamentu leitura sentesa ba kazu ofensas integridade fizika simples ne'ebé involve arguidu VAQ hasoru vítima AM. Kazu ne'e akontese iha 17 Agostu 2012, iha Distritu Ainaro.

Ministeriu Públiku akuza katak arguidu lori besi kanu rohan hodi baku dala rua iha vítima nia kanotak. Aktu ne'e rezulta vítima tenke ba baixa iha óspital Maubisse durante loron lima nia laran.

Relasiona ho kazu ne'e, Ministériu Públiku akuza arguidu kontra artigu 145 Kódigu Penál kona-ba ofensas ba integridade fizika simples.

Iha tribunal arguidu deklara katak rekoñe faktus sira ne'ebé akuza hasoru nia. Maski nune'e sira diak malu depois loron ida tuir mai. Aleinde ne'e sira nunca iha problema antes no depoisde akontesimentu ne'e.

Iha alegasaun finál, Ministériu Públiku husu ba tribunál kondena arguidu ho pena prizaun tinan 2 no suspende ba tinan 3. Defeza husu ba tribunál atu fo pena suspesaun ne'ebé kman ba arguidu.

Tribunál konklui kazu ne'e no kondena arguidu ho pena prizaun tinan 1 fulan 6 suspende ba tinan 2 no selu kustus judisiais US\$ 20.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl